

Inatsisartut aalajangiiffigisassaattut siunnersuutigineqarpoq Naalakkersuisut meeqqat atuarfiata aaqqissuuseqqinnissaannut peqqussut, killiligaanani oqaaseqarsinnaaneq aammalu ajunngitsumik oqallissinnaaneq meeqqat atuarfiata siunertaanut ilannguteqqullugit.

(Inatsisartuni ilaasortaq Laura Táunâjik, Siumut)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq.)

Siullermeerinninneq

Naalakkersuisut Laura Taunâjik, Siumut, aalajangiiffigisassatut siunnersuummut qutsavigaat.

Naalakkersuisut siunnersuuteqartoq isumaqatigaat, killiligaanani oqaaseqarsinnaatitaaneq aammalu ajunngitsumik oqallissinnaaneq meeqqat atuarfiata siunertaanut ilanngunneqassasoq, oqartussaassuseqarfiusumi ileqqorissallugit pingaaruteqartut aammalu atuartitsissutaasariaqartut.

Siunnersuuteqartup siunnersuutigaa killiligaanani oqaaseqarsinnaatitaaneq aammalu ajunngitsumik oqallissinnaaneq meeqqat atuarfiata siunertaanut ilanngunneqassasoq, "ilinniartitaanerit ataqtigisumik eqaatsumillu aaqqissuussat"-mi, maanna nalilersuinermik ineriartortitsinermillu suliniummi. Maannakkulli nalilersuinermik ineriartortitsinermillu suliniummi siunertamik allannguisoqassanersoq naliliisoqanngilaq.

Killiligaanani oqaaseqartitaasinnaanermut sammisaq, immikkut taanngikkaluarlugu meeqqat atuarfiata siunertaanut atuuttumut ilaareerpoq. Imaakkami, meeqqat atuarfiata, angerlarsimaffit suleqatigalugit, atuartut namminneq isummaminik annisisinnaanissaannut siuarsanissaat ersimmat, kiisalu atuartut demokratiskimik eqqarsartariaaseqarnissaannut ilinniartinneqassasut, namminnerlu pisinnaatitaaffitik demokratiskiusut ilisimalissagaat. Ajunngitsumik oqallissinnaanermut sammisaq, immikkut taanngikkaluarlugu, aamma meeqqat atuarfiata siunertaanut ilaavoq, allaaserineqarsimallunilu atuartut inunnut allanut akuersartaunissamut ataqqinninnissamullu pisinnaasaqalissasut.

Meeqqat atuarfiata siunertaata allanngornissaanut taarsiullugu, tassanimi killiligaanani oqaaseqarsinnaatitaaneq ajunngitsumillu oqallissinnaaneq, immikkut taanngikkaluarlugin ilaareermata, Naalakkersuisut suliniutigissavaat sammisassat pillugit, ilikkagassatut anguniagassani ilikkagassatullu pilersaarutini atuartitsissutini assigiinngitsuni sammisassat tulluarfigisaanni pingaaruteqarfigisaannilu erseqqissaasoqassasoq. Tamanna pisinnaavoq politikkikkut, ilikkagassatut anguniagassat ilikkagassatullu pilersaarutinik nutarsaasoqarnissaanut aalajangiisoqarneratigut. Sammisat atuartitsissutini allani tulluartuni isumaqartunilu ilanngunneqarsinnaapput.

Ilikkagassatut anguniagassanik ilikkagassatullu pilersaarutinik erseqqissaasoqarneratigut, killiligaanani oqaaseqarsinnaanermut aammalu ajunngitsumik oqallissinnaanermut tunngasunik, ilinniartitsisut aamma, atuartitsinissaannut piareersaasiornissaannullu tapersersuutaassaaq. Taamaasilluni ilikkagassatut anguniagassani ersersinneqassaaq, sammisani taakkunani atuartitsinissaq piumasaqaataammat, ilikkagassatullu pilersaarutini qanoq sammisat taakku sammineqarsinnaaneri ersissalluni.

Tassunga ilaliullugu eqqaaneqassaaq ajunngitsumik oqallissinnaanermut sammisaq, UPA2019/59-imut, digitaliusuni ileqqorissaarnissamut attuumassuteqarmat. Sammisaq taanna ilaatigut digitaliusuni pissusissamisoortumik ileqqoqarnissamik oqallissinnaanissamut sammisuuvoq, ajunngitsumik digitaliusuni isorinnittumik, isumannaatsumik atuilluarnissamullu tunngasuulluni. Ullumikkut oqallinnerpassuit digitalikkut ingerlanneqartarput, soorlu nittartakkatigut attaveqatigiiffinni nutaarsiassaateqarfinnilu. Atuartut digitalimik atuilluarnissaannut pissuserissaarnissaannut, atuarfeqarfinnut atuarfeqarfinnilu suliaqartut arlallit pilersinniakkanik arlalinnik aallartitsererput. Digitalikkut atuilluarsinnaaneq, ataatsimut isigalugu digitalikkut piginnaasaqalernissamut ilaavoq, tamannalu IT-mik suliaqarnermik ilaalluni, meeqqallu atuarfianni atuartitsissutini ataasiakkaani atuartitsissutinilu qanitariissuni ilaallutik.

Tamanna tunngavigalugu Naalakkersuisut siunnersuutip itigartinneqarnissaa innersuuppaat.